

# Lawatan bersejarah Anwar

Pertemuan dengan El-Sisi bertepatan dengan sambutan 65 tahun hubungan diplomatik Malaysia-Mesir

Daripada  
Sariha Mohd Ali  
sariha@bh.com.my

di Kaherah,  
Mesir



Datuk Seri Anwar Ibrahim memulakan lawatan rasmi empat hari ke Mesir dengan bertemu Presiden Mesir, Abdel Fattah El-Sisi di Istana Al Ittihadiya, semalam.

Lawatan Perdana Menteri atas jemputan El-Sisi kali ini adalah bersejarah kerana bertepatan dengan sambutan 65 tahun hubungan diplomatik Malaysia-Mesir yang bermula sejak 10 November 1959.

Ini adalah lawatan kali kedua Anwar ke Mesir sejak dilantik sebagai Perdana Menteri dengan lawatan pertama dilakukan pada Oktober 2023.

Selain mengadakan pertemuan empat mata dengan El-Sisi di Istana Al Ittihadiya, Anwar antara lain turut menjadi hos sesi libat urus bersama kapten industri utama tempatan dan menyampaikan ceramah umum kepada pelajar serta kakitangan Universiti Al-Azhar.

Anwar dan El-Sisi juga dijadual menyaksikan pertukaran memorandum persefahaman



Anwar dūring El-Sisi (kānān) bersalaman dengan Mesir di Istana Al-Ittihadiya, semalam. (Foto BERNAMA)

(MoU), termasuk di antara Malaysia dan Al-Azhar Al-Sharif bagi kerjasama di Fakulti Ulum Islamiah dan MoU bagi kerjasama Malaysia dan Mesir dalam bidang hal ehwal agama.

Terdahulu, pesawat khas membawa Perdana Menteri dan delegasi mendarat di Lapangan Terbang Antarabangsa Kaherah pada kira-kira jam 6.30 petang waktu tempatan (jam 12.30 tengah malam Ahad waktu Malaysia).

Ketika di Dewan Ketibaan Presiden, Anwar memeriksa kawalan kehormatan membabitkan 16 anggota tentera Mesir.

Perdana Menteri diiringi Menteri Luar, Datuk Seri Mohamad Hasan; Menteri Pelaburan, Perdagangan dan Industri, Tengku Datuk Seri Zafrul Tengku Abdul Aziz; Timbalan Menteri Peralihan Tenaga dan Transformasi Air (PETRA), Akmal Nasrullah

Mohd Nasir serta Timbalan Menteri Sumber Asli dan Kelestarian Alam (NRES), Datuk Seri Huang Tiong Sii.

Ketibaan Anwar disambut Perdana Menteri Mesir, Dr Mustafa Madbouly; Duta Besar Malaysia ke Mesir, Datuk Mohd Tarid Sufian dan pegawai Malaysia di Kaherah.

Hari ini, Anwar akan ke Riyadh, Arab Saudi bagi menghadiri Sidang Kemuncak Negara Arab-Islam yang akan membincangkan situasi terkini di Palestin dan Lubnan, serta perkembangan serantau, sebelum kembali semula ke Kaherah pada malam nanti meneruskan program rasmi di sini.

Anwar kemudian akan mengadakan perbincangan bersama delegasi perniagaan Malaysia dan

kemudian merasmikan pusat operasi pemasangan (CKD) Proton Saga di Mesir.

Kira-kira jam 2 petang Selasa ini (jam 8 malam waktu Malaysia), Anwar dijadual berlepas bagi mengetuai delegasi Malaysia menghadiri Sidang Kemuncak Kerjasama Ekonomi Asia Pasifik (APEC) 2024 di Lima, Peru.

Seterusnya, beliau bersama delegasi Malaysia akan berlepas ke Rio de Janeiro, Brazil, bagi memenuhi undangan Presiden, Luiz Inacio Lula da Silva, untuk menghadiri Sidang Kemuncak G20.

Perdana Menteri sebelum ini mengadakan rangka lawatan kerja ke China selama empat hari berakhir Khamis lalu.

Lawatan itu adalah atas jemputan Perdana Menteri, Li Qiang supaya Anwar menghadiri Ekspo Import Antarabangsa China ke-7 (CIIE ke-7) di Shanghai, yang juga hab kewangan global.